



Միսաք Մեծարեւնց

Տապի նոպաներ

Ջրաշոգին գետին վրայեն ամպանըման կը բարձրանա.
կը փողփողին լազվարթ գույներ ճամբան ի վեր Կապույտ-Դարին.
շինականներ արևահար, ծերունի մը գլուղակ տարին.
արեգակի բորբ ընձյուղներ կ'այրեն ամեն ինչ անխընա:

Դարուղիեն կ'անցնին դանդաղ ուղտերը գորշ կարավանին,
թաթավելով իրենց հոգին հրրայքին մեջ տոթական.
երազանքին կիսատ թողած, գինով գինով վարդեր ինկա՛ն,
առանց սյուքի ու պլպուլի կը հեծե ցավն իր վարդենին:

Տիվագուլի երակներով բացավայրերն են բոցափայլ,
ծաղիկներու հոգեվա՛րն է, ժամն արևոտ տաղտապանքին.
բազմագեղուն բուրնունքներն են հեշտագրգիռ ու տապագին,
մենաբաղձիկ անտառին մեջ ո՛չ հեծություն կա, ո՛չ դայլայլ:

Ժայռերն անփույթ դեռ կը տաքնան, հանդարտորեն, լուսափողփող,
գիրկն անդորրին այս կիզանուտ և երազին տակ բոցավառ,
հնձողներու ձեռքեն հոս հոն հանկարծ կ'իյնա գերանդին վար,
ամենուրեք կը խլլրտի նոպան տապին տախտապարող:

Ըսպասումն է հեղգ ու ջերմին, կ'ուշանա դեռ հովն իրիկվան,
որ գովացիկ, պիտի մեղմե տենդն անպարփակ այս թալուկին.
ջերմակարոտ, փաղփուն օձեր լեռներեն վար կը սողոսկին,

և՛ հըրաշունչ արբշիռ ու բոցերագ՝ մերթ կը հևան:

Դաշտերու մեջ ընկուզիներ կը քընանան հոս հոն ցանցիր,
ո՛չ ճամփորդ կա, ո՛չ ալ թռչուն իրենց շուքին տակ ապաստան.
հսկա խորխի պես կ'երկարի, լայնատարած, մենիկ ճամփան՝
ուր սըլացքի ու քայլերու հետին մընո՛ւնջն իսկ չի հաժիր:

Թուրինջ գույներ ջրրանըկար... Ծիրանի հե՛վք արևմարին...
Մըշակներ ու ձիավորներ պարտեզներեն կը դառնան տուն,
խարխուլ կամուրջն անոնց բեռին տակ կը հեծե խոնջ ու նըկուն,
գետեն անդին երանգ ու ձայն հետզհետե կը մարմըրին:

Ահա գիշերն ալ ծանր ու մեղկ կը գըլորի սարերեն վար,
ու տապահար դաշտավայրեր կը հագենան աղջամուղջով.
կենսանորոգ շունչ կը բերե ըսթափանքի կազդույրն այս գով,
բայց ցորեկին դեռ կը տևե բազմալեզու տենդն հըրավառ: